



*Estrara Komuniko EKO 2018-13 sendita el Budapeŝto, la 12an de majo.*

*Al: Landaj kaj Fakaj Asocioj de UEA (aliĝintaj kaj ne). Plie al la Komitato, Konsilianoj, regionaj komisionoj de UEA, ILEI-aktivuloj, TEJO-estraro, gazetaro, partoprenintoj en iuj AMO-seminarioj, aliaj listoj kaj unuopuloj.*

Por tuja uzo kaj plia diskonigo inkluzive de la alkroĉaĵoj kun indiko de fonto: EKO de UEA

## AMO atingas jam sian kvindekon!

Tiun rimarkindan atingon ĝi plenumis en nur iom pli ol 4 jaroj. Plia unika atingo, AMO unuafoje aperas en la Universala Kongreso – almenaŭ en nia kompreno de la signifo de AMO. Grava kaj urĝa temo trudas sin al la bezono de vasta debato – kiel UEA kreskigu sian membronombron kaj limigu la perdon de membroj. Tiu temo tro specifas por AMO-seminario ie ajn aliloke en la mondo, do alvenis la tempo por la jubilea 50a AMO-seminario, kiu okazos en 2 sinsekvaj tagoj dum la UK en Lisbono, kun eble enkonduka sesio en tria tago (kredeble la dimanĉo). Tiu seminario estos alirebla de ajna kongresano, sed samtempe lokos sin inter la seminarioj de la komitato, kiuj devas fronti la vivgravan demandon – manke de aliaj signifaj enspezfontoj – kiel UEA pli forte kreskigu la membronombron por tiel resanigi la financon pozicion de la Asocio.

Jen kiel ni atingos la AMO-kvindekon:

### AMO 50 en UK:

Kiel (re)altigi la membronombron de UEA. Aperos en la junia numero de la revuo *Esperanto* enkonduka artikolo, kiu aliras la demandon per sepo da temoj, kiuj iĝos la diskuttemoj por grupoj en la lisbona seminario. Venu kaj kontribuu – aŭ pli grave, proponi vian propran laborforton al la urĝega bezono. La seminarioj okazos ĉu lunde-marde aŭ ĵaŭde-vendrede, depende de la postuloj de la formulado de la UK-programo. Jen la sep subtemoj:

1. Ĉefaj mesaĝoj, celgrupoj, okazoj
2. Rolo de la junuloj kaj TEJO en membro-varbado
3. Rolo de la landa kaj loka agado
4. Rolo de revuoj kaj komunikiloj
5. Rolo de seminarioj kaj gvidiloj
6. Rekonceptado de la servoj de UEA
7. Alternativoj al la dependeco je membrokotizoj



### AMO 49 en Madrido:

En la semajno tuj antaŭ la UK, okazos la 51a Kongreso de ILEI (jam kun preskaŭ 200 aliĝoj), samtempe kaj samloke kun la 77a Hispana Kongreso. Ambaŭ kongresoj jam gastigis AMO-seminaron. La traktotaj temoj estas eksteraj rilatoj kaj la transdono de kulturo. Inter la gvidantoj: Robert Kaminski (PL) pri ZEO-j, Marc Cuffez (BE) pri la Unio de Internaciaj Asocioj (UIA), Mirejo Grosjean, Stefan MacGill kaj Sara Spanò.

## AMO 48 en NASK:

Tiu nordamerika somera lernejo jam plujare gastigis AMO-seminaron, ĝenerale pri son- kaj film-registrado kaj uzado. Seminario okazos denove en 2018 en Raleigh, la ĉefurbo de la Norda Karolino inter la 4a kaj la 11a de julio. Informoj: <http://nask.esperanto-usa.org/venonta/>

## AMO 47 en Pollando:

La seminario okazos ene de semajno en Góra, urbeto en la okcidenta Pollando, kies programo estis jam prezentita en EKO 12 kiu disiris en la 30a de aprilo. La temo estas 'Esperanto serve al la artoj -- la artoj serve al Esperanto.' Ni raportos la rezultojn, kiuj utilos por pli vasta publiko, ĉar tiu temo revenos kadre de la populara aranĝo 'Kleriga Lundo' en la UK en Lisbono, kadre de la Jaro de Kulturo, kiun UEA kunfestas.



## Nitobe-simpozio tuj post UK en Lisbono

La 4-an kaj 5-an de aŭgusto en Lisbono okazos nova Nitobe-simpozio kun la temo "instruado kaj esplorado pri Esperanto en soci/inter-lingvistiko kaj en sociaj sciencoj". La simpozio estas aŭspiciota de la Centro de Esploro kaj Dokumentado pri Mondaj Lingvaj Problemoj (CED). Ĝi estas subvenciata de *Esperantic Studies Foundation* (ESF). Danke al tio ne estas kotizo. ESF ankaŭ prizorgos kafo-pauzojn kaj komunan manĝon. La simpozio okazas ĉe la Universitato de Lisbono en la konstruaĵo Reitoria da Universidade de Lisboa, Alameda da Universidade, PT-1649-004 Lisbono. Pli da informoj en la alkroĉaĵo.

La bildoj: Nitobe Inazo (1862-1933)  
Nitobe sur monbileto (1984-1993)



Vidu ankaŭ: [https://eo.wikipedia.org/wiki/Nitobe\\_Inazo](https://eo.wikipedia.org/wiki/Nitobe_Inazo)

## Greziljono: La somera programo

- 2018-julio-09/27 2-a Maratona Esperanto-kurso dum 18 tagoj (7+5+6) kun Perlo Miela, Louis Jeuland, Nina Korĵenevskaja, Mikaelo Bronŝtejn
- 2018-julio-09/16 4-a Interŝanĝoj de scioj kaj faroj kaj Esperanto-kurso
- 2018-julio-15/21 Semajno de ĉiĉeronado en la regiono Anĵuo kun Catherine Kremer
- 2018-julio-16/21 Speciala semajno kun kursoj de Esperanto
- 2018-julio-21/27 30-a Internacia E-Konferenco de OSIEK « Esperanto en Artoj »
- 2018-aŭgusto-11/19 8-a Festa Semajno por infanoj kaj familioj

## Libroj donas al ni eblojn vidigi nin

Okaze de la Internacia Tago de la Libro, la Distrikta Biblioteko "Dinicu Golescu" Arĝeŝ kaj la Teknologia Liceo "Dacia" en la urbo Piteŝti, organizis sesion "Publika Legado" en la rumana kaj en Esperanto, fine de aprilo. Invititoj estis s-ro Marian Vochin el Bukureŝto, historiisto de la

rumana esperantista movado, kaj s-ro Cristian Sabaŭ, ĵurnalisto kaj E-tradukisto en la urbo Pitești. Ĉeestis ankaŭ la verkistinoj Denisa Popescu kaj Simona Liutiev.

Tri tagojn poste, la rumana televido Antena 1 Pitești invitis s-ron Marian Vochin partopreni en televida disaŭdigo "Draga Personaj Principal" (kara ĉefa persono), kie li estis intervjuita de s-ino Denisa Popescu, televida ĵurnalistino kaj verkistino, pri la lingvo Esperanto, L.L.Zamenhof kaj la esperantista movado en Rumanio. La rumanlingvan intervjuon eblas rigardi ĉi tie:

[https://m.facebook.com/story.php?story\\_fbid=990641411100035&id=100004625562599](https://m.facebook.com/story.php?story_fbid=990641411100035&id=100004625562599)

vortoj: 925



Maldekstre: s-ro Voĉin klarigas la avantaĝojn de Esperanto. Dekstre: De maldekstre Profesorino por la franca lingvo, verkistino Simona Liutiev, Marian Vochin kaj Cristian Sabaŭ

=====

Ĉi tiu komunikado estas disponebla laŭ la permesilo Krea Komunaĵo Atribuite Samkondiĉe 4.0 Tutmonde. Por pli da informoj vidu ĉe: <<https://creativecommons.org/licenses/by-sa/4.0/>>.

Aperintaj komunikoj legeblaj ĉe: <http://aktivulo.net/eo/content/komunikoj-pri-agado>

**ALDONU VIN:** Skribu al <stefan.macgill<ĉe>gmail.com>. Neniu alira kondiĉo aldone al valida retadreso. Malferma al Aligitaj Membroj, eksmembroj, neniam-membroj, volapukistoj ktp.

**SUBTRAHU VIN:** Skribu al la supra adreso. Donu vian nomon, retadreson, landon kaj (se eble) la grupon aŭ kialon por via ĉesto en la ekspedolistoj.